

Saturday, May 23, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

CYMA

Central YMA chuan Aizawl Vaivakawn-ah Ruihhlo Do Street Campaign a buatsaih a.

Vaivakawn Branch YMA President Pu PC Lalhuapzauvan kaihuaiin CEC Pu Ramsangliana chuan Ruihhlo chi hrang hrangin mihring nun, khawtlang nun leh chhungkua a tihchhiat nasat zia sawiin ruihhlo do kawnga theihtawp chhuah tlang turin mipuite a ngen a. Ruihhlo avanga chhungkua in an tlak chhiat phah nasat zia leh ruihhlo tihnan sum leh pai a ngaih hnem zia te, ruihhlo ngai nei chhungkua ten rilru hah leh hlim lohna an nei mai piah lamah nasa taka chhungkaw khawsakin a tuar zia te a rapthlak tak meuh a. Zan lama thalai tei vak nasa leh hlimna zawng nasa in ruihhlo a hnimhnaih thu a sawi bawk.

Street Campaign ah hian Central YMA General Secretary Prof. Malsawmliana leh CEC memberte leh a chhehvel Branch YMA hruaitute an tel bawk.

Central YMA hian Ruihhlo Do Street Campaign Aizawl khawpui chhung hmun 15 a buatsaih tawh a, tun thla ni 30 ah Lengpui ah neih leh a ni ang. Street Campaign hi mipuiin Ruihhlo Do a tul zia an hriatna tura infuihtharna hun remchang a nih avangin Central YMA chu a hlawk viau in an hria a, a remchan angin chhunzawm zel an tum tih an sawi a ni.



MZP

Mizo Zirlai Pawl MZP chuan Mizoram Public Service Commission (MPSC) buatsaih Jr. Grade of MAH&VS Direct Recruitment chungchangah thil fel lo a awm ngei niin an hria a; MPSC thuneitute chu an thil tih dik tawk loah mawhphurhna la ngam tur leh he hna lakna kaihnawih thil zawng zawng pawh tun thla ni 29 hma ngeia a bul atanga tan that a nih theih nana hma la turin MPSC an phut.

MZP hruaitute hian vawiin khan Aizawl Press Club-ah thuthar thehdarhtute kawmin, MZP president Pu C Lalremruata chuan, Vety department atana MPSC-in hna a lak tur chungchangah hian thla hmasa ni 27 khan MPSC chuan written result a tichhuak a, post 4 lak tur a nih laiin written result chhuakah mi 3 chauh tih tlin an ni a. He hna diltu zingah MPSC-in nikum October ni 24-a valid list a tihchhuahah mi 101 an awm a, chu'ng zinga mi 74 te chuan written exam hi an hmachhawn, a ti.

Pu C Lalremruata sawi danin, thla hmasa ni 7 khan written result chhuakah mi 3 chauh an tling chu mak tiin MPSC lam an zawt fiah a, written exam hmachhawn zinga mi 71-ten written exam an paltlang loh chhan chu MPSC online

form/portal-ah Veterinary Council registration an upload loh vang niin MPSC lam chuan an sawi a; MZP-in a zirchianna-ah mi 71-te hnen atangin MPSC form, online portal an fillup lai hian Veterinary council registration certificate upload na tur option/slot a awm loh bakah online form-ah hian thlan tur dah a ni lo a ni.

Hetihlai hian, MZP chuan Mizoram sorkarin Tourism director hna chelh tura sorkar hna atanga pension tawh Pi Lalrodingi a ruat nawn chu tha lo an tih thu an sawi a, sut leh ngei turin Mizoram sorkar an ngen.

MZP president Pu C Lalremruata chuan sorkar hna atanga a pension hnuah sorkar-in Officer on Special Duty to the Chief Minister atana a ruat Pi Lalrodingi chu a hna pangngai bakah Tourism Director hna chelh tel tura ruatna order sorkarin a tichhuak chu mak an tih thu a sawi a; sorkarin mi pakhat duhsak bik a nei chu pawih an tih thu leh he order hi sut leh ngei tura sorkar an ngen thu a sawi.

Tun thla ni 13 khan MZP hruaituten Chief Minister Pu Lalduhoma chu hemi chungchangah hian an kawm a, director atana pension tawh rawih nawn an duh loh thu an hrilh thu leh Chief Minister chuan ngaihtuah nawn leh a nih tur thu ziakin MZP-te a pek tih MZP President chuan a sawi a ni.

MZP president chuan sorkar hnathawk pension tawhte rawih nawn dan hrang hrang - adviser, consultant leh OSD-te chu an sawisel loh thu a sawi rualin, department pakhat direcor tura mi pakhat duhsak bik a ni chu tha lo an tih thu leh an dodal tlat dawn thu a sawi a ni.

Puan tawh angin Pi Lalrodingi hi sorkar hna atanga a pension hnuah Mizoram sorkar chuan OSD to CM leh Tourism Director atana rawih nawnna Order a tichhuak. Hei hi MZP chuan na taka an dodal hnuah sorkar chuan OSD to CM ah chiaah a dah ta a, hetihlai hian nimin khan OSD to CM bakah Tourism Director hna hi a pek belh a ni.

